

# A R T Z A Y A K .

Goazen, artzayok, goazen,  
Goazen aldan lenen,  
Jesus jayorik dago  
Gure zai Belenen.

Aingeru batek digu  
Berria ekarri,  
Jesus Belenen dala  
Mundura etorri;  
Bildots bana arturik  
Diyogu alkarri,  
«Goazen eramatera  
Zeruko aur orri.»

*Goazen, etc.*

¡Ai zein kanta ederrak  
Ditugun aditzen,  
Zerukoak dirala  
Zaigu iduritzen!  
Millaka aingeruak  
Zaizkigu argitzen,  
Airietan kantari  
Orra non dabilten.

*Goazen, etc.*

Ara aingeru-tropak  
Zer kantatzen duan,  
Gloria Jainkoari,  
Gloria Zeruan;  
Pakea gizonari  
Betiko munduan,  
Orra zeru-lurretan  
Zer poza dagoan.

*Goazen, etc.*

Estalpe bat jauregi  
Eta bertan aska,  
Ona nolakoa dan  
Aur onen seaska;  
Kolchoetzat lastoak  
Ipiñirik dauzka,  
Idi-astoak dute  
Berotzen asnazka.

*Goazen, etc.*

Eguzkia diruri  
Zure arpegiak,  
Izar eder bi berriz  
Dituzu begiak;  
Laztantzen zaituztela  
José ta Mariak,  
Bete dituzu oso  
Zori-onez biyak.

*Goazen, etc.*

Poztu gaitu ¡o Jesus!  
Gu zure jayotzak;  
Emen dakaizkitzugu  
Artzayok bildotsak;  
Agur Jesus maittea,  
Bagoaz gu pozak,  
Zuri utzirik emen  
Guzion biyotzak.

*Goazen, etc.*

PEDRO MIGEL URRUZUNO-KOAK.